

INDUSTRIAKO PRODUKZIOAREN HAZKUNDEA OREKATUA DA, EZ ORDEA ENPLEGUARENA

Bizkaiko hazkundera Gipuzkoa eta Arabakoarekin parekatzen ari da

■ Bizkaiko industriaren ekoizpena Arabakoaren eta Gipuzkoakoaren hazkunde mailara iristen ari dela erakutsi du Bizkaiko Aldundiaren koiuntura txostenak. Hala ere, enplegu alorrean egoera askoz okerragoa da Bizkaian beste bi herrialdeetan baino.

Joseba Aiarza / bilbo

EUSKAL AUTONOMIA ERKIDE-GOKO ekonomiak eutsi egin dio aurtengo lehen hilabeteetan iaztik zekarren hazkunde tasari, industri jarduera sendoa oinarrituta. Hazkunde hori aurreko bi urteetan baino orekatuagoa da gaur egun EAEko hiru herrialdeen artean, Bizkaiko Foru Aldundiaren koiuntura txostenak erakutsi duenez.

Fernando Olmos Ogasun ahal-dun bizkaitarrak txosten horren lehenengo alea aurkeztu zuen atzo. Txostenaren berezitasuna, haren hitzetan, aldagai ekonomikoekin batera fiskaltasunaren gaineko argibideak ematea da. Aldundiak hiru hilabeteen behin argitaratzeko asmoa dauka.

Txostenaren arabera, Bizkaiko ekoizpen jarduerak hobera egin du iazko bigarren erdialdetik hona, 1996an eta 1997ko lehenengo erdialdean izandako atzerapenaren ondorioz. Horrela, Bizkaia lortzen ari da produkzioaren jarduera Gipuzkoako eta Arabako tasen parera hurbiltzea.

Industri produkzioaren hazkunde neurtzen duen IPI indizeak %15,8 egin du gora Bizkaian aurtengo lehen hiruhilekoan, %16,9 Araban eta %13,5 Gipuzkoan, Eustat estatistika erakundeak emandako datuek diotenez. EAEko batez besteko hazkundeak, berriz, %15,5ekoa izan da, eta Espainiako Estatuakoa %10ekoa.

«Hala ere, hazkundearen bizitasun hau kontu handiz hartu behar dugu, Bizkaia beste herrialdeak baino egoera kaskarragotik aterako eta horregatik errazagoa delako hazkunde



Bizkaiko altzairutegi trinkoa, herrialde horretan zabalduko azken industri gune nagusia.

XOUSE SIMAL

tasa handiak lortzea», zehaztu du Olmosek.

Izan ere, 1997ko martxora arte Bizkaiko produkzio jarduerak %7,8 egin zuen behera, eta Araba eta Gipuzkoak bitarte horretan %4ko eta %3ko hazkunde tasak izan zituzten.

Herrialderik bizkorrena, Araba • Atzerriko merkatuen eskaria izan da EAEko hiru herrialdeen ekonomia hazkunde bultzatu duten eragile nagusietako bat. Esportazioak gehitzen ari dira hiru herrialdeetan (%34,3 Araban, %15,4 Bizkaian eta %8,1

Gipuzkoan), baita inportazioak ere, industriaren sendotasunaren ondorioz.

Era berean, EAEko hiru aldundiek zergen bidez bildutako diru kopuruaren hazkunde egoera ekonomiko onaren erakusgarri dela azaldu du Olmosek. EAEko ogasunek %10,6 diru gehiago bildu dute lehenengo hiruhilekoan.

Hala ere, kasu honetan Bizkaiko diru biltzearen hazkunde txikiagoa izan da beste bi herrialdeetakoaren aldean: Bizkaia lehenengo hiruhilekoan %2,2 gehitu du bildutakoa (%3,8 urtebete),

eta Araban, berriz, hazkundeak %13,1ekoa izan da (%10,1ekoa urtebete). Araba baita EAEko hazkunde ekonomikorik bizkorrena duena.

Azkenik, lan merkatua da hiru herrialdeen arteko ezberdintasunik nabariena erakusten duen kontua, Bizkaia kalterako. Lanik ezak hiru herrialdeetan behera egin badu ere, langabezi tasa %22tik gorakoa da Bizkaian (%21,3koa edo %22,6koa, inkestak Espainiako INEK edo EAEko Eustatek egin duen); Araban %14-15ekoa besterik ez da, eta Gipuzkoan %16-18 bitartekoa. X

Langai enplegu zerbitzuak 100.000 kurrikulum jaso ditu dagoeneko

■ 1996an abian jarri zenetik, 4.300 enpresak egin dituzte euren lan eskaintzak bertatik

Erredakzioa / Donostia

LANGAI Enplegurako Euskal Zerbitzuak lan bila dabilzen 100.000 kurrikulum ditu dagoeneko bere datu basean. Eusko Jaurlaritzako Lan Sailak sortutako zerbitzuak azaldu duenez, horietatik 1.000 beste erkidegoetatik etorritakoak dira, eta gainontzeko 99.000 kurrikulumak EAEtik bertatik heldu zaizkie. 100.000 kurrikulumeko kopurua uztaileko lehen astean lortu du Langai enplegu zerbitzuak.

Bestalde, dagoeneko 4.300 enpresak eskaini dute lana Eusko Jaurlaritzako zerbitzu horren bitartez. Hala, enpresa horien guztien artean 11.000 lanpostu eskaini dira Langaiaren bitartez, 1996an abian jarri zenetik. Langaiaren eta dituen zentro lankideen artean, 18.000 enplegutari hartu dute parte.

Aurtengo lehen sei hilabeteetan lortu ditu Langai orain arteko emaitza onenak. Aurtengo 24.000 kurrikulum jasotzea aurreikusi zuen Langaiak, datu basean 110.000 izan arte. Beraz, zerbitzutik bertatik jakinarazi dutenez, orain arte bezala jarraituz gero, erraz gaindituko dute kopuru hori. Aurtengo lehen sei hilabeteetan, dagoeneko, iaz baino lanpostu gehiagotarako bitartekaritza egin du Langaiak. X

Euskadiko Kutxak %15,5eko hazkuntza izan du iazko epe bereko emaitzekin alderatuz

Erredakzioa / Donostia

EUSKADIKO KUTXAK 11.300 milioi pezetatik gorako emaitzak izan ditu aurtengo lehen sei hilabeteetan (452 milioi libera inguru). Emaitza horrek %15,5eko hazkunde adierazten du iazko urteko lehen sei hilabeteetako emaitzen aldean. Hala, 1998an negozioaren bolumena nabarmenki hazi da, eta horrek irabazietan izan du bere isla.

Ongizate Aurrezkia izeneko plangintzak izandako arrakasta azpimarratu du Euskadiko Kutxak lehen sei hilabeteetako balantzearen berri ematean. Plangintzaren bidez 59.000 milioi pezeta bildu dira. Izan ere, Ongizate Aurrezkiak epe jakinerako ezarpenen errentagarritasun bera eskaintzen du, baina dirua edonoz aterako daiteke. X

Juan Costa: «Aldundiek aurkeztu aldaketek bat egiten dute Gobernuak PFEZren gainean pentsatutako aldaketekin»

■ Madrilgo Ogasun idazkariak adostasunak desadostasunak baino gehiago direla esan zuen atzo

Erredakzioa / Bilbo

JUAN COSTA Espainiako Gobernuak Ogasun idazkariak atzo azaldu zuenez, EAEko foru aldundiek aurkeztutako erreforma fiskalerako aldaketa proposamenak begi onez eta errespetu osoz ikusten ditu. Adierazpen horiek Euskal Enpresarien Zirkuluak Getxon antolatutako bazkarian parte hartu baino lehen egin zituen Madrilgo Ogasun idazkariak.

Errentaren gaineko zergaren alorreko aldaketei dagokionez,

administrazio zentralaren eta foru aldundien arteko adostasunak desadostasunak baino gehiago direla azaldu zuen atzo Costak. Alde horretatik, Costa gustura agertu zen; izan ere, berak esandakoaren arabera, «aldundiek aurkeztutako aldaketek bat egiten dute Espainiako Gobernuak PFEZ Pertsona Fisikoen Errentaren Gaineko Zergari dagokionez pentsatutako aldaketekin».

Ogasun idazkariak atzo esan zuenez, EAJ eta PPK alor honetan dituzten elkarrizketak inolako

arazorik gabe doaz. «Erreforma fiskalaren helburuei dagokionez, adostasun ia osoa dugu», esan zuen atzo Getxon Juan Costa Ogasun idazkariak.

Alderdi Popularrak Euskal Herrian dituen buruzagiak, aldiz, orain arte ikusi ahal izan denez, ez daude batere ados foru aldundiek PFEZren erreforma proposatutako aldaketekin. Hala, Batzar Nagusietan erreformarako testua atzera botako duten mehatxua ere egin dute. Costak, horren gainean, honela hitz egin zuen: «Euskadiko

Alderdi Popularrak egin beharreko zuzenketak egingo dituela uste dut».

Ogasunari egindako iruzurraren gaineko ikerketaren inguruan ere mintzatu zen Juan Costa atzo. Ikerketa horri esker 2.764 milioi pezeta jaso ditu Espainiako Finantza Ministerioak. Juan Costak Getxon egindako adierazpenetan esandakoaren arabera, iruzurraren aurkako ikerketa eta horren aurka neurriak hartzea orain dela hilabete asko abian jarritako proiektua da. X